

Wanagiri Prangwadanan, Pigeaud, 1953, #1461

Katalog : Wanagiri Prangwadanan, Pigeaud, 1953, #1461

Sambung : -

Wanagiri Prangwadanan

1. Dhandhanggula

1. sêkuning tyas satata dera mrih | mardawaning lukita sarkara | sinukarta
sakadare | daruna mardi kayun | sing kayungyun kalaning nguni | Jêng Pangran
Prangwadana | cangkramèng wana gung | lawan catur atmajendra | Jêng
Pangeran Ngabèi lan ingkang rayi | Pangran Natakusuma ||

2. wontên malih ari kang umiring |

--- 2 : 191 ---

Jêng Pangeran Pakuningrat lawan | Prabuningrat katigane | catur ingkang
tumuntur | narpatmaja ingkang wêwangi | Pangran Sumadiningrat | tuwin
malhipun | Radyan Mas Sasradijaya | yeka wadu-wandawa widagdèng budi |
umiring tindakira ||

3. mring pakuwon aran Wanagiri | prênah kidul sawetaning praja | kalih dasa pal
têbihe | purwanta tindak ngriku | wit kacuwan ing tyas duk nguni | umiring mring
kang rama | amarêngi rawuh | pakuwon ing Jumapala | ngitêr sima gagal kasaput
ing ratri | marma sami ubaya ||

4. benjang môngsa têrange kang riris |

--- 2 : 192 ---

patêmbayan lan sang atmajendra | mangsuli sardula pinèt | nanging ta kang
pirêmbug | pra winêrda tan nyuwawèni | yèn tindak Jumapala | wit kinintên
suwung | de mêngtas kataman brana | sayêktine maksih tansah ngungsi têbih |
sumingit sêsiluman ||

5. ing pangrêmbag amung Wanagiri | langkung saking pikantuking papan | tur
pasthi kathah sangsame | trêkadhang kadhing nyandhung | sima gora ginêrêk
gampil | wêdale pinarapal | binut binarubuh | rêbah sinanjata wantah | langkung
pedah yèn pakuwon Wanagiri | kinarya kalangênan ||

6. dumadya nut sang iswarasiwi |

--- 2 : 193 ---

mit mring rama rinilan sakarsa | tinamtu badhe bidhale | saking ing dalêmipun |
ri Raditya Kaliwon kaping | sadasa Dulkangidah | warsa Be pinetung | tinêngêran
kang sangkala | pangèsthining barakan sarira nunggil |[1] sapraja Surakarta ||

7. de pra kadang kadeyan kang miring | marang kangjêng sang iswaraputra |
pêpijèn sawatarane | pinatah pantêsipun | lan karsanta Jêng Pangran Bèi | pra
kadang mung sajuga | kang tinuduh tumut | Jêng Pangran Gôndasuputra | tuwin
ta sang winêrda ingkang bêbisik | nararya Brajanata ||

--- 2 : 194 ---

8. katrinira ingkang awêwangi | Arya Suryadarmaja kalawan | Dyan Mas
Wiraasmarane | wontên malih tumuntur | Dyan Mas Widaningrat lan malih | Dyan
Mas Mlayaatmaja | wontên kanthinipun | Radèn Mas Wiryakusuma | tuwin Dyan
Mas Brôntajaya sinung kardi | mêngêti lèlampahan ||

9. tabah sapta satata miranti | kuda rata rakiting pêpara | pinarak pinarnahake |
munggèng ngarsa supênuh | dumaruduh pra kadang prapti | kadeyan tuwin
wadya | kang arsa dumulur | ngatêr sawawining kitha | mawa rata wênèh mahana
turanggi | andhèr nêng abyantara ||

--- 2 : 195 ---

10. tandya bidhal jinajaran dening | wimbasara myang Prawiraaswa | catur
tumuntur wurine | ginarbêg gumarubyug | ing pra kadang kadeyan wingking |
lajêng ing lampahira | manjing jro anjujug | wiwara ing pangabeian | atmajendra
dangu dènira ngêntosi | lan para kadangira ||

11. ingkang badhe dhèrèk mring wanadri | juga Jêng Pangran Natakusuma | kang
rayi katri kanthine | busana sami jumbuh | Pangran Pakuningrat lan malih | Jêng
Pangran Prabuningrat | jajar lênggahipun | lan Pangran Sumadiningrat | tuwin
Tuan Jan Sêmit ingkang piniji | umiring marang wana ||

--- 2 : 196 ---

12. lagya eca lênggahan sami | katon prapta ratane kang raka | jumug mring
ngajêngane | pinêthuk sampun tundhuk | ingacaran pinarak kursi | sinuba
sinunggata | sêsadêhan dinum | tumêrah tumêkèng wadya | samantara antara
têkaning wanci | tabastha bidhalira ||

13. rêmpêk-rampak lampahirèng margi | rata rantap-rèntèp kang mariksa |
sauruting dalan gêdhe | wadon kèh cêngêng dulu | pra satriya ingkang
cangkrami | pangarsa wimbasara | sikêp dwaja cukup | cikat tangkêping
turôngga | Wiraaswa mangsah mêrak amarapit | marêpat wuri ngarsa ||

--- 2 : 197 ---

14. langkung asri rakiting lumaris | trus mangidul jog wijiling kitha | ing Bacêm
pasabrangane | Babagan kêbêk buntu | bêlêg para pambêlah mranti | rêmbaya
bayak prapta | tumrah tumaruntun | wong agung sarawuhira | sami nitih
agêming rama kang nami | Kiyai Cakranggana ||

15. para kadang kang mung ngatêr margi | tuwin wadya-wandawa kang samya |
anguntapkên mring tindake | kalilan sami wangsul | sawusira andum basuki |
arjaning lumaksana | sanalika kêbut | kêbat lampahirèng palwa | rawuhira brang
kidul pinêthuk dening | pra wadya jawi kitha ||

--- 2 : 198 ---

16. sira Pôncasuwirya Ngabèi | kang rumêksa pasanggrahan boga | sabawah sapanêkare | akanthi mantri gunung | saking Kêpuh kapalan sami | samapta wimbasara | cacahira catur | tumuntur mawa bandera | dupi rampung pangrantam glaring lumaris | tan aris bidhalira ||

17. sêsêrungan sinarawung dening | para wadya kang garêbyêg rata | rantap katon titihane | asri lamun dinulu | muncaring kang songsong kaèksi | lir baskara umimba | wau lampahipun | praptèng dhusun Sukaharja | kinurmatan tarub samadyaning margi | rinênggèng sarwa pelag ||

--- 2 : 199 ---

18. pinalisir lêlungsir kang têpi | têtêpungan tumpanging suyasa | pradôngga umung swarane | yeka pahargyanipun | Dyan Mas Wiryakusuma nami | wadya jêng sri narendra | rumanti sêsugun | saha sapanêkarira | ngayun-ayun kayungyun yèn dèn kèndêli | para gung kang cangkrama ||

19. dadya têmah angecani kapti | mung sakêdhap sami sinunggata | num-inuman sêsamine | tumrah tumêkèng wadu | tan antara wong agung sami | pamit gya bêbidhalan | saha wadya kêbut | rikat lampahing swandana | Sukaharja samana sampun kawingking | ing Kêpuh kawistara ||

--- 2 : 200 ---

20. uparêngga rakiting kang margi | sinung palang palêngkung goraya | rantap katon rêrontèke | têkèng têping tarub | tinaratas turut ing tritis | linungsir sinambungan | têpi têpung ujung | wastra di winarna tiga | gêdhah seta rêkta rêspati cinincing | sarawuhirèng kana ||

21. kinurmatan pradôngga nyêggani | dadya kèndêl lampahing swandana | lajêng lêlênggahan andhèr | rêsêp samya angunjuk | num-inuman sarwa mêmêki | sêsambèn sabênira | imbalan pamuwus | masalah bêrêg mring wana | Sang Naraya[2] Brajanata mursitani | tatane mamrih sima ||

--- 2 : 201 ---

22. tan adangu titihan miranti | kêbut bidhal kinurmatan gôngsa | kadi nalika
rawuhe | gumêr gumêrah umung | gumarêdêg ginarbêg dening | wandawa tuwin
wadya | sumahap supênuh | mangkana ing lampahira | sêrungan kras turôngga
sinêrêg sami | kapungkur Kêpuh prapta ||

2. Pangkur

1. sabranganing Panambangan | sri kawuryan bandera munggul kèksi | pinalang
pilar palêngkung | longkange tinaruban | pradôngga gung binarung nyabawa
umung | mangkana para satriya | rawuh ing pakuwon sami ||

2. lèlênggahan ing pandhapa |

--- 2 : 202 ---

sinunggata sadêhan amêpêki | wedang minuman lumintu | lumuntur wadya
tôntra | ingkang mêthuk Jayasarônta cumundhuk | umêndhêg mêndhak mring
ngarsa | makidhupuh silastuti ||

3. dinulur sakondhangira | asawega turôngga rata sami | wong agung anggung
andangu | rakiting para wadya | paranta wus rumanti ngantyèng wana gung |
umatur Jayasarônta | sampun rinakit duk ratri ||

4. suka sagung pra satriya | tandya mundhut titihan rata prapti | budhal saha
wadya kêbut | kinurmatan pradôngga | barung umung kadya duk ing rawuhipun |
lêpas lampahing swandana | padhusunan Krisak kèksi ||

--- 2 : 203 ---

5. suka prasami mariksa | sawêngkoning guwa na wana wukir | radinan waradin
munggul | pêrak lan patêgilan | graning arga ginaga ginaru-garu | ginalêng
ginula-gula | jinagang môngka kêkirih ||

6. tumrah tumurun mring sawah | tirta rèjèng narajang jurang bambing | gummyak
swarane kumrusuk | kumrasak anêlasak | mring garumbul kumbul kentar
anglêluntur | umili milir balabar | balèbèr ngêbèri sabin ||

7. sabên sinabèng kukila | gung kinala pêksi kang ngrêrusuhi | ginusah lawan
binêntur | ginantêr kinêplok | ingkang pêrak ginoprak pinêlak mabur | milar
anilap mring wana |

--- 2 : 204 ---

umangsah môngsa woh ringin ||

8. marma kèh pala kasimpar | kar-tumangkar pinagêr ing parigi | tinarap ing
taru-taru | tinurus tinalenan | palawija awijah datanpa surud | kasorotan ing
prabawa | wong agung kang sami prapti ||

9. jujugan anjog ing wana | gya umandhap sami mundhut turanggi | sampat
saampilanipun | tundhan matundha-tundha | tinindhihan rônga tuwin
dêmangipun | samapta mawa wisaya | jajaring jinèrèng miring ||

10. tandya lumêbêt ing wana | praptèng papan panggungan wus miranti | rikatan
pangrakitipun | Sang Jayawilatikta | kang pinatah ngrukti gèlaring wadya gung |

--- 2 : 205 ---

mangsah amêrêk mring wana | sawusing binagi-bagi ||

11. umarêk matur pratela | wadya gosok wus mangsah saking ngarsi | pra gusti
gya minggah panggung | panggenan sowang-sawang | asamapta kang sanjata
tuwin pistol | pungkas kilèn linêkasan | aglar nara karya pinrih ||

12. mêrpat ngrapêti rumagang | ngangsêg mangsah rumuruh amarapit |
garumbul gêng kang tinêmpuh | golongan lêng-ulêngan | surak sora kapyarsa
sarosa umung | bëndhe kukuk bal-ambalan | lir tuhu têmpuking jurit ||

13. winangun glar prit anêba | dê mang rônga numpak kuda nindhihi | gumêr
gumêrah gumrêgut | prêbatang kajungkelang |

--- 2 : 206 ---

ginalandhang tibèng jurang gumalundhung | tan kèndhat tundha-matundha |
kandhah karêndhi kèh kandhih ||

14. buron baran bêbarakan | kèngsêr mingsêr kasêsêr nilap nêbih | gumrêgut
sangsaya sêngkut | kang bêrêg buron wana | lata lingkab kakab berongkab
rinênggut | rinênggêp kinarya balang | tibèng garumbul lir grimis ||

15. galagah ginilês rêbah | binalengkrah pinokah kapalipis | papasan pinapas
putus | tatase taratasan | nihan gantya kang cêcadhang munggèng panggung |
gêlar wangun arda côndra | rikatan rinakit dadi ||

16. kang môngka madyaning byuha | yeka Kangjêng Pangeran Angabèi |
sakadang kadayanipun |

--- 2 : 207 ---

Pangran Natakusuma | lan Jêng Pangran Pakuningrat pêrakupun | Jêng Pangeran
Prabuningrat | tan têbih lawan kang rayi ||

17. Pangran Kusumadiningrat | tuwin Tuwan Jan Sêmit amarapit | pangapit Jêng
Pangran Prabu | Prangwadana kalawan | Pangran Gôndasuputra lan putranipun |
Radèn Mas Wirasuputra | panggung mrêgil kang dèn gèni ||

18. nararya Suryadarmaja | anggung pêrak lan sang iswarasiwi | kang tansah
cakêt ing ngayun | Dyan Mas Mlayaatmaja | rèh piniji rumanti sanjata pistol |
sawadya juru warastra | Arya Brajanata mangsit ||

19. aywana sabawèng sabda | ri sêdhênging miyarsa surak atri |

--- 2 : 208 ---

myang bëndhe umung mangungkung | pra gusti têmah samya | musthi agêm
sanjata myang pistolipun | pinuji pinuja-puja | winatêk winanti-wanti ||

20. tistis tan ana sabawa | muhung mëndêng aluraning karêndhi | mangkana
wontên kadulu | sangsam gung bêbarakan | apêpanthan wijile saking garumbul |
lumajêng jog ing panggungan | binarondong ing bêbêdhil ||

21. buyar umilar lumajar | miris giris giras dinrêsan mimis | lir garimis
praptanipun | sanjata narawantah | datan kêmba barondongan swaranipun |
wana kawêlahar kobar | ambabar sumêbar kadi ||

22. ardaning baswara ditya |

--- 2 : 209 ---

pra satriya karênan aningali | karêndhi kandhih binandhung | ing wuri mêksa
prapta | bancang sanga sadasa sawênèh pitu | baranggah panggah amarnah |
ujunging gêlar kapering ||

23. Jêng Pangeran Prangwadana | awas mulat nyandhak kontanira glis | tinit
panitisipun | tajêm ingarah-arrah | tinamakkên têpaking karêndhi ambruk | pêjah
binarondong kathah | dadya sukaning pra gusti ||

24. nyarêngi lawan punika | Jêng Pangeran Ngabèi andhawahi | sangsam jagar
kênnya lampus | binendrong tinutuhan | wus mangkana pra gusti sadangunipun |
marma kèh sangsam kabranan | tabêting rah kocar-kacir ||

--- 2 : 210 ---

25. tinitik tiniti priksa | grêma gumrah gumêrah analiti | tapaking rah tibèng
rumput | tinurut ing saparan | para gusti saking sukaning kalangkung | bujana
mung anèng wana | bêbêrêg kongsi saari ||

26. kasapih suruping surya | mênthung prapta ngêndhanu ing wiyati | dumadya
prasamya kondur[3] | rawuh ing pasanggrahan | kinurmatan pradôngga binarung
umung | praptèng têping taratag | umandhap saking turanggi ||

27. lèlènggahan nèng pandhapa | kalênengan tansah munya ngrêrangin |
pinarakan kongsi dangu | gya sami lêluwaran | sowang-sowang kondur mring
pakuwonipun | nahênta kang maksih samya |

--- 2 : 211 ---

nèng wana pinatah nitik ||

28. janma silar rêbut papan | angupadi aluraning karêndhi | anata mring gunung-
gunung | myang nadining guwa na | wênèh urut têpi tirahing rong sirung | kèh
solahing para grêma | tanpa kanthi mung lan bêdhil ||

3. Kinanthi

1. kang nitik wus tan pikantuk | labêt kasaput ing ratri | gya wangsul sumusul
marang | pakuwon atur udani | yèn sami kecalan lacak | karêndhi kang
nandhang kanin ||

2. tan kainan ing pangruruh | pra grêma kang sami mamrih | pangulik arga guwa
na | mubêng saubênging kikis |

--- 2 : 212 ---

datan môntra kasat mata | mu[4] tumrahing rah katawis ||

3. yèn saking watawisipun | lajêng jumug mring bèji | kamayaning sato kewan |
sayêkti waluya malih | ngungun kang sinung pratela | puwara angkahing galih ||

4. benjang enjang wanci bangun | badhe ambêbêdhag malih | malah arsa ngalih
papan | kang pancèn prayoga pinrih | parnahing wana tan kiwa | kinawitan wetan
ardi ||

5. mangilèn panggosokipun | rêmbag sawusira dadi | dan[5] sami lêlangên gita |
ginanti sêsêndhon gêndhing | panjuta byor marakata | pradôngga munya
ngrêrêngih ||

--- 2 : 213 ---

6. senggolan panabuhipun | sinêndhu sêsindhèn ririh | murange mring karawitan
| sawatara dhasar pinrih | lêlagon lagu limbatan | mêmbat wilêtane manis ||

7. mêmarah mamrih raras rum | Ni Mbok Rara Tarurêsmi | rêsêp kang sami
miyarsa | kaarsayan para gusti | sêdhêng gêndhèng gêndhing barang | boyong
sinêlan kinanthi ||

8. imbal kalawan pra kakung | badhud sakawan nyênggaki | kêploke ambata
rêbah | idêring larih mawanti | dènirandon andrawina | nutug tan awalang-ati ||

9. tumêrah tumêkèng wadu | prasamya pinanci-panci |

--- 2 : 214 ---

sacukupe tan kuciwa | sinuba tinami-tami | tinaman lukitatama | tan kêndhat
kaberan warih ||

10. lèladi ladèn lumintu | lumantar katur pra gusti | sanajan wadu-wandawa |
ingidêran tan apilih | sumalin-salin sumêla | sêlane sinêling-sêling ||

11. kang srutu winantu-wantu | linangsar lèlèngsèr rukmi | sukèng tyas sang
narpatmaja | tindak mara marêpêki | marang unggyaning pradôngga | pra gusti
têmah umiring ||

12. lajêng lèlènggahan ngriku | mikani kang angrêrêngih | pathêt gèndhing
Lobong barang | binarung liking sêsuling |

--- 2 : 215 ---

tiniling têka mêmêla | amilalu milangêni ||

13. kumênjut anganyut-anyut | sênggaking badhud ngêdhasih | wor rêsmine
langên swara | gèndhing gèndhèng rêbut manis | kongsi kalungsèn ing môngsa |
ingkang andrawinèng ratri ||

14. mong winong sadangunipun | sakathahing para gusti | tan ana rêngu
rinêngat | sumarah sinarah sami | dadya rakêting kêkadang | kinudang saeka
kapti ||

15. dupi têkèng lingsir dalu | Kangjêng Pangeran Ngabèi | ngajak ing raka
luwaran | lèlêson ngaso mring panti | munya gèndhing Yak-ayakan | bibar para
wadya nangkil ||

--- 2 : 216 ---

16. kang pinatah sami kantung | punggawa amung kang kêmit | kalawan kang
caos nganglang | sambang saubênging puri | wimbasa kajinêman | nahan
wursitaning ratri ||

17. mêrbangbang wetan mèh bangun | sumorot sirating rawi | rêmu rawat
sumamburat | gamêng mega malang kèksi | kartika abyor ing tawang | kalane
kèlêm kalindhah ||

18. prabaning baskara nawung | nèng graning arga mèh kengis | kongas kikising
akasa | kasat mata yayah kadi | sasmitèng wadya sagôtra | kang samya karsa
angrukti ||

19. wurahan jago kaluruk | umung swarane kang pêksi |

--- 2 : 217 ---

sabèng kusambi sabawa | wênèh mrih wohing waringin | mêrak manguwuh
ngumandhang | myang sata wana munyanjrit ||

20. mawor swaraning kang lêsung | ing padesan kanan kering | pating
karênthung kapyarsa | mung lamat tabêting têbih | praptaning wadya gumêrah |
gumuruh jujuk wanadri ||

21. dê mang rônga tindhihipun | samapta mawa turangi | byar raina praptèng
wana | marpat ngrampit gèn karêndhi | kêkalèn kinalang-kalang | jinerengan
jaring wuri ||

22. rinakit rekaning laku | ing mangke tibaning kardi | aywa kongsi dadi duka |
ing karya ywa nguciwani |

--- 2 : 218 ---

dadya tri èwu ginêlar | têtung têtising wanadri ||

23. rumanti mung nganti tuduh | mangkana ta para gusti | sampun miyos ing
pandhapa | umandhap mundhut turangi | sigra anitih sadaya | bidhal gôngsa
urmat atri ||

24. rêrikatan lampahipun | kapungkur ing Wanagiri | jumug anjog mring wana | pangruktine panggung mranti | rinakit rikatan dadya | Wilatikta kang nênggani ||

25. pra gusti sarawhipun | lajêng mapan panggung sami | binagi-bagi gènira | tinata kadya duk wingi | rinakit glare wus dadya | mundur titihan turanggi ||

--- 2 : 219 ---

4. Durma

1. para gusti wusira musthi sanjata | sasmita kèn ngawiti | panggosoke sangsam | surak rame wurahan | kukuk myang kêkêplok atri | anrang jêjurang | wadyalit golong pipit ||

2. wrêksa bakah rêbah kasulayah pokah | balasah bosah-basih | saya ngangsgê mangsah | tumêrah sami ngrurah | rumput rampat berat rinit | rinoban kathah | binêrêg sinrang gusis ||

3. lung-êlungan nêng kalèn pupul pulêtan | lawan witing panjalin | rug karangkud rungkat | sinèrèd kasarakat | lingkab latanira sêbit |

--- 2 : 220 ---

punggêl binabad | binirat tibèng têbih ||

4. alang-alang kang ngalingi lêluwangan | galagah golong trêtip | kawêlagar kobar | tumangkar agni nular | ra-ara bebas binasmi | buron kèh milar | umilir amalipir ||

5. nut jêjurang rêrèjèng bambing sinêrang | anilêb nilap nilip | mring siluk siluman | mung kidang lawan sangsam | giras aringas wit giris | silar umilar | tumular wuri ngrapit ||

6. bêbancangan palajênge salang-tunjang | binujung nunjang wani | pêthane
pêpanthan | saking lor kidul wetan |

--- 2 : 221 ---

para gusti aningali | kathahing sangsam | praptane wali-wali ||

7. mangu mêngêng mêmangun wênganing prana | paranta kang pinilih | de
kalangkung kathah | anjêprah padha branggah | puara[6] arahing galih | sok
pakoliha | kalamun pêrak pinrih ||

8. barondongan lor kidul têngah sauran | tan kêndhat kang bêbêdhil | karêndhi
gung kandhah | kandhuhan brana kathah | kasok kasarakat kongsi | akêkalangan
| tinangkêp saking wingking ||

9. wadya gosok arame ngangsgêg umangsah | surak sarosa atri | sangsam
bilulungan |

--- 2 : 222 ---

lumayu megung malang | tambuh paran kang ingungsi | ngarsa sanjata | ing
kanan kering agni ||

10. para gusti kalangkung sukaning driya | myat sangsam kontrang-kantring |
kumpul karompolan | saparan garubyugan | tan kêndhat ingkang bêbêdhil | ing
wuri ngarsa | ing kanan miwah kering ||

11. pra wadya glar balabar lir gunung kobar | arame nyênyuraki | palajênging
sangsam | anunjang mring panggungan | gègèr kang katrajang ngisis |
dadyantuk lawang | ambobol babal balik ||

12. salang tunjang binujung kinalang-kalang | kathah kang nandhang kanin |

--- 2 : 223 ---

tabête kang êrah | tumêrah tibèng lêmah | kumocor akocar-kacir | kècèr saparan
| pinaran tinut wuri ||

13. para grêma aniti tumêkèng wana | saparan tinut wingking | pra gusti sadaya
| ing tyas kalangkung cuwa | gagal kèh karêndhi kandhih | kandhah kabranan |
tan ana kang ngêmasi ||

14. sami kondur anitih turangganira | tansah samargi-margi | arame rêrasan |
solahe ingkang sangsam | tuhu lamun milangêni | nadyan tan angsal | lêga
raosing galih ||

15. lon-alonan sarawuhing pasanggrahan |

--- 2 : 224 ---

gôngsa munya ngurmati | gêndhing Langên-gita | salendro pathêt sanga |
sinêndhu sindhèn ngrêrêngih | angarah-arrah | irama rangkêp kalih ||

16. lajêng sami pinarakan ing pandhapa | ginêm rèh ing wanadri | Arya Brajanata
| tansah mêdhar wasita | wêwaton ing nguni-uni | para satriya | marwasa mrih
karêndhi ||

17. duk swargining jêng gusti kang kaping tiga | myang jaman kaping kalih | kèh
glaring satriya | kang mardi mêmardawa | onjo-onjoting pambêdhil | mawarna-
warna | dènira mamrih luwih ||

--- 2 : 225 ---

18. ana karêm mring wana mung lawan grêma | manginte ngintip-intip | têpining
guwa na | myang graning arga pringga | rumangsang anrang ing wèsthi | tarwas
lumêkas | kikisane tyas pinrih ||

19. ana wênèh kang datan wanuh mring wana | bingung kasaput ratri | dumadya
susulan | tuhu karya kangelan | kalaning ratri tan panggih | dupi wus enjang |
sêdhênge anibani ||

20. kapiyarsa swaraning sanjatanira | mung lamat saking têbih | sigra pinarêkan
| kang ngruruh para dêmang | kapanggih gya jinak mulih | angsaling sangsam |

--- 2 : 226 ---

ginotong munggèng ngarsi ||

21. ana tekang satriya wasis nyanjata | onjo anglêluwihi | yèn angarah sangsam |
ywa kongsi katingalan | mimise pinrih umanjing | jroning jêrowan | ing tabêt tan
katawis ||

22. sabên-sabên bêbêrêg ika mangkana | tan ana kang madhani | ing
sapadhanira | tuhu kaliwat-liwat | wasise yèn ambêbêdhil | kalok kaloka | têkèng
lyaning nagari ||

23. pra taruna kandhih kandhuan ing kôndha | kawignyan anglangkungi | tur
elok alôngka | lêkase saka ngapa | pagunan ngeram-erami |

--- 2 : 227 ---

yèn jaman kina | kang wêgig anjêmparing ||

24. mung madyaning pandhawa Radyan Arjuna | dadya ojat sabumi | prakara
umanah | ing mangkya têka ana | kawasisan kang ngèmpêri | duk jaman kuna |
kunêng kang ngungun sami ||

25. sampun wanci majêng saosan bujana | Jayasarônta aglis | mapak anoraga |
ngrêpèpèh angrêrêpa | pun dasih saos udani | sampun samêkta | satataning
sêsaji ||

26. Jêng Pangeran Arya Prabu Prangwadana | mêraki mring kang rayi | risang
atmajendra | ingaturan bujana |

--- 2 : 228 ---

ing wayah pan sampun wanci | lungse punika | sêdhênge sami bukti ||

27. dan bujana ambanjêng ingkang kameja | sêsambèn sabên bukti |
andrawinèng gita | ginanti langên swara | tan sora irama ririh | angarah-arrah |
gambuh ingkang ngrêrêngih ||

5. Gambuh

1. dhaharan kongsi dangu | tan lyan malih kang anggung dinangu | para grêma
kang nglêlacak mring wanadri | mangulik mring gunung-gunung | myang
jêjurang rancah sigrong ||

2. wontên ta kang umatur | yèn pra grêma sampun sami lapur | kang ngêngudi
nênitik rahing karêndhi |

--- 2 : 229 ---

kang kandhuhan kanin agung | putêran tan môntra manggon ||

3. tinurut tansah murut | maksih giras datan môntra tutut | kados lajêng
umanjing sajroning bèji | jrum angum atêmah tuntum | waluya tan sèstu layon ||

4. pra gusti sami ngungun | ing pangrêmbag mangke badhe mangun |
kalangênan amisaya ulam kali | pukul gangsal tindakipun | wisaya wus amirantos
||

5. sampune adhêdhawuh | marang wadya kang sami pinatuh | mring narmada
rumanti ngrukti jêjaring | gya luwaran sami kondur | sowang-sowang amakuwon
||

6. praptaning sontênipun | wisaya glar tumrah tumaruntun | amiranti tarap
sauruting kali |

--- 2 : 230 ---

pra gusti sawiyosipun | trus sami tindak mangalor ||

7. jajaran angalajur | wuri rampak pra wadya dumulur | songsong mêkar
kataman sunaring rawi | kadya wangkawa manawung | sumirat-sirat sumorot ||

8. atap têping ranu | kang dêdulu praptaning lumintu | swara rame arungan
samargi-margi | gumêrah gumêr gumrumung | gumrênggêng rêgêng tumawon ||

9. lampahe amanikung | trus mangetan jog ing loji agung | kangjêng tuwan
asistèn kang dèn ampiri | jinujug gya jinak ngirup | umiring marang rêrumpun ||

10. asistèn sukèng kayun | panujyèng tyas lami ngayun-ayun | kalangênan mèt
ulam kang anèng warih |

--- 2 : 231 ---

kalalène agung anggung | nèng bantaran angarompol ||

11. lajêng ing lampahipun | mêdal kori butulan tumurun | tan antara katon
madyaning banawi | gumlaring palwa kadulu | atarap kadya ginembong ||

12. umilir galur sêlur | dwaja panjrah lumantar lumuntur | kêlap-kêlap kumilat
amilangêni | wong agung sarawuhipun | jumugug manjing jroning jong ||

13. mudhik mêdhaki kêdhung | wisaya glar amiranti têtung | jala krakap rikat
tinangkêbkên warih | tumêrah wuri tumruntun | jêjaring jinèrèng ngisor ||

14. sêsambê sundhit pungkur | susuk ngangsgêg saking wuri sêlur | sangsaya kèh
misaya mangsah marapit |

--- 2 : 232 ---

marpat jêroning kêkêdhung | karungkat raming rêrumpon ||

15. mina kèh kapalayu | kênèng daya agunging panumpu | tagèh wagal
anênggêl gèning jêjaring | rinakêt rikat rinangkut | surak sagung kang nênton
||

16. kalalèn kali nêmpuh | mring karakap gya cinêkêl kukuh | sinandhatan mring
dharat katur ing gusti | tan sinipi sukanipun | myat ulam sami ginotong ||

17. gêngnya sapêluk-pêluk | pacal jambal wagal myang kêkutuk | badhèr andhar
winudhar tan dèn sandhati | urang-watang tuwin lèmpuk | tinumpuk dadya
saênggon ||

18. surake wadya umung | para gusti sukèng tyas kalangkung | nging kasar
mèh surup sirating rawi |

--- 2 : 233 ---

rawat-rawat mara sêmu | mrêbangbang mega bang kulon ||

19. kalingan ing rêrayung | kadyangganing wangkawa manawung | kang baita sakala tinuduh minggir | prapta tindak mring têtarub | têtining nadi tan adoh ||

20. ngêlèskên kuntanipun | ganti-ganti ing sadangunipun | kangjêng tuwan asistèn mung aningali | kalane êlêng tinuju | sukèng tyas akêplok-kêplok ||

21. rampunging lesan kondur | jinajaran wadya angêlajur | praptèng loji ingampirakên tinami | tinampan sinugun-sugun | kang sunggata tarap katon ||

22. nèng jaba banjêng kêmput | num-inuman patrape pinatut | para gusti rêsep ing driya nanggapi |

--- 2 : 234 ---

sadêhan dalêdêg dulur | lumuntur wadya tan agop ||

23. lênggahan kongsi dangu | pukul sapta têtèng tabuh wolu | kang ginunêm tan lyan kalanira nguni | ambêbêrêg mring wana gung | kathahing sangsam kang katon ||

24. pinunggêl ingkang catur | atmajendra amit arsa kondur | têtabean asistèn ngatêr ing kori | mubyar obore ngêlajur | binêktèng rôngga nom-anom ||

6. Sinom

1. wus rawuh pakuwonira | lajêng manjing jro pandhapi | urmat gôngsa Boyong barang | binarung sindhèn ngrêrêngih | Bok Rara Tarurêsmi | rumaras rêsmining kidung |

--- 2 : 235 ---

sêsêndhon Puspanjala | binarung langkung rêspati | apratitis têtês ing rèh
karawitan ||

2. pra gusti suka miyarsa | dumadya sami mêdhaki | lênggahan cakêt lan gôngsa
| kêpung kupêng amarapit | marêpat salin anggit | gerongan laguning kidung |
kinanthi sêsênggakan | Jêng Pangeran Angabèi | murwèng gita amithat pathêt
manyura ||

3. mangkana ukaranira | kang winor bukaning gêndhing | padhang bulan
kêkêncaran | sêdhênge purnama sidhi | pratitis anêtêsi | tibèng cengkok gong
jumêglug | saplak kalawan laras | jawilan pradôngga ririh |

--- 2 : 236 ---

ngarah-arrah irama rinangkêp tiga ||

4. tar wus lamun kawuwusa | ingkang mangun sukèng ratri | bibar kongsi lungse
môngsa | tan sayah kang nglêladosi | saking lêganing kapti | myat pra tamu
sukanipun | Jêng Pangran Prangwadana | tuhu lamun sônta budi | mrih rênane
para sagung atmajendra ||

5. pinèt sapênêding karsa | sinarah tinari-tari | sasat tamuwan narendra | sinuba-
subèng sêsanti | tan sêpi pinarsudi | sarjuning tyas arjanipun | marma pra
wadya-tôntra | karonta dènnya ningali | dene gusti wus satiti lir kang rama ||

6. nahan ta kang winursita |

--- 2 : 237 ---

wus andungkap bangun enjing | ambanjêng wadya sahaya | ingkang sami saos
karti | andhèr munggèng pandhapi | mijil ampilan angumpul | malapar
ambalabar | gumêlar marpat nèng ngarsi | atmajendra umijil sakadangira ||

7. Jêng Pangeran Prangwadana | wus dangu dera ngêntosi | lan para kadeyanira |
lêlênggahan ing pandhapi | karsanta para gusti | tinamtu ing konduripun |
nênggih ari punika | nanging miyos ing banawi | lêlancaran datan mawi upacara
||

8. wahana tata turôngga | dhinawuhan ngrumiyini | kèndêl ing Bacêm sadaya |

--- 2 : 238 ---

nihan para rajasiwi | bujana nêng pandhapi | bibar lajêng bidhalipun | kampir
mring asistenan | amit jinurung sakapti | myang pinuji raharjaning lumaksana ||

9. sasampuning têtabean | gya tindak ginarbyêg abdi | praptèng têpining
narmada | gumlar kang palwa miranti | tinata turut têpi | atap imbanging
têtikung | agêm titihanira | palwa ran Naga Basuki | sinukarta warata tinêpi
wastra ||

10. sinung dwaja wuri ngarsa | paremudha kang linuri | kapraboning jaman kina |
agêming pangran dipati | pambêlah kapat ngarsi |

--- 2 : 239 ---

gangsals ingkang munggwèng pungkur | kalêbêt malimira | jumbuh kang busana
sami | sruwal oblong binênting sêsarungira ||

11. kulambi rinangkêp meja | caping capu anjapiping | abêbênting sabuk abang |
èpèk lulang cinèt langking | satatanggun tinanting | watangan dêling tinutul |
lêmpêng tur balandaran | cêcawang kinarah mathis | para gusti rawuh gya anitih
palwa ||

12. ing saupacaranira | pra wadya sami mêmilih | supênuh numpak ing palwa |
tan ana towong sawiji | pradôngga amiranti | nêng gembong ginandhèng ngayun
| salendro pelog barang |

--- 2 : 240 ---

bidhal kalênengan muni | Kêbogiro slendro irama slêbêgan ||

13. kêmpule mêlung ngumandhang | gong saha ngombak jaladri | kêndhang
guguk cêciblonan | salênthêm ulêm ngalèbi | dumadya kèh kang prapti | tarap
satêpining ranu | karênan dera mulat | mring wong agung kang cangkrami | saha
wadya gumlar amawa bandera ||

14. kadya girindra kusuma | umili milir malipir | jaring jala munggèng ngarsa |
misaya samargi-margi | gumrah surake atri | yèn ana ingkang pikantuk | dadya
saurut marga | padesan kang dèn langkungi | samya saos panggang tumpêng
lan dawêgan ||

--- 2 : 241 ---

15. suka sang nararya putra | myat parimarmaning alit | sakadar samya
sunggata | sabobote kang palinggih | dadya sasmitèng dasih | pinrih nampèni
sêsugun | ana ta janma wrêda | kapiluyu milayoni | mara mêrak pra nata atur
kukila ||

16. salindhitan namanira | endah ulêsipun wilis | Kangjêng Pangran Prangwadana
| suka nanggapi pribadi | kalawan dhawah paring | arta tigang kêton wutuh |
myang sinung pangandika | dahat ing tarima kasih | salamêta ing saanak
putunira ||

17. kaki-kaki langkung suka | mêmuji arjaning gusti |

--- 2 : 242 ---

tanapi sagarwa putra | myang wadu-wandawa sami | mangkana kang lumaris |
aris myat rarasing ranu | langkung asri kawuryan | uparêngganing gêgisik |
tanêmane pasêtrèn maneka warna ||

18. jagung jarak lan sêmôngka | kêceme kara kêcipir | timun nêdhêng tumaruna
| tumaruntun lan kêrai | rêngkêt rukêt tumali | marambat manglung tumêlung |
katon têtêp atapan | kadya lumakwa pinêthik | mring wong agung kang lêlana
nitih palwa ||

19. wênèh gisiking narmada | sumilak sinawang têbih | tinêbèng pêksi kèh saba |
sabawa masin talisik |

--- 2 : 243 ---

drêkuku tuwin trinil | barakan brêkutut runtut | rantap mring pajagungan | sariti
tuwin srigunting | bèthèt pênthèt pêpanthan mêdhaki boga ||

20. dupi prak lampahing palwa | umabur ngambara ngalih | masinan saliyanira |
kang kèri sami binêdhil | ginusah dèn kêploki | umilar sinênèp rampung |
tumpêsan tumpa-tumpa | dènira sami winasis | mundhi astra pratitis tètès lan
karsa ||

21. nihan wau lampahira | ngambah tikungan wanadri | singub sumingêb kang
papan | kêdhung gêng tirta amringin | labêt kasilir angin | ngarompyoh kang
taru-taru |

--- 2 : 244 ---

kèh swaraning kukila | mèt boga arungan atri | jalak cocak kuthilang glathik
sikatan ||

22. dheyot dhècu rang-urangan | têngkèk-buta lan srigunting | kacêr kèkèt lan
sêpahan | sribombok têping warih | cohung mêlung mêlingi | mêmêla lir
anênulung | wor jriting sata wana | jêgigrèk nèng graning wukir | lir nambrama
wong agung ingkang cangkrama ||

23. myang swaraning buron wana | warna-warna kapiyarsi | saengga
mangayubagya | basukine kang lumaris | kapungkur ing wanadri | ing Kêdhung
Banthèng wus rawuh | kèndêl arsa mariksa | rêrumpon kang dèn irupi |

--- 2 : 245 ---

mung sakêdhap bidhal dhawuh marang wadya ||

24. saangsale sinusulna | sandika ingkang tinuding | lajêng wau lampahira | ing antara têngah ari | ing Panambangan prapti | wontên dasih kang umatur | yèn sunggata bujana | sêsaji sampun sumaji | nêng pakuwon saha boganing pra wadya ||

25. Jêng Pangeran Prangwadana | alon aturira ririh | mring rayi jêng atmajendra | punapa ta karsa kampir | dhatêng pakuwon ngriki | kang rayi wangsulanipun | lamun sambadèng rêmbag | prayogi lajêng lumaris | bok kadangon ing mangke praptaning praja ||

26. idêran laku prayoga |

--- 2 : 246 ---

bujana lawan lumaris | bujêng cêkape kewala | pangran raka nyuwawèni | lajêng sasmitèng dasih | sunggata sami pinundhut | tan randhat praptanira | lumantar katur pra gusti | myang pra wadya kèdêran boga warata ||

27. tan winarna solahira | mangkana ta sampun prapti | ing taman kataman warsa | adrês praptane kang riris | têtahan para gusti | sami kèndêl lampahipun | sêsambèn amariksa | saosan rumpon rinukti | nulya sami mijil saking palwanira ||

7. Mijil

1. laju manjat satêpining gisik |

--- 2 : 247 ---

mangsah mring pakuwon | siniwaka pra wadyanirandhèr | wisaya glar mêtak
amiranti | tarap turut têpi | têpang-têpung ujung ||

2. jala krakat rikatan umanjing | sajroning rêrumpun | rêmpêk rampak abayak
rakite | mina molah kang milar sumilir | kèh kênêng jêjaring | jala sundhit susuk
||

3. ngangsgêg nêsgêg sêngkut ngrêrungkati | ram sajroning êrong | barung umung
aramé suraké | nging kasaré sirating Hyang Rawi | nglêlambat umanjing |
udayaning gunung ||

4. sirêm-surêm diwangkara tistis | candhik-ala katon | para gusti samana
rêmbage |

--- 2 : 248 ---

amung badhe nglajêngkên lumaris | tan karsa ngêntosi | wadya kang nênumpu ||

5. tandya bidhal nitih palwa malih | umili mangalor | lon-alonan panyatang
wêlahe | kang lêlana lêngên ing kali | sukêng tyas ningali | sauruting ranu ||

6. sirêm surya sasôngka umijil | kartika kèh katon | angrênggani gêgana sunare |
kawistara sauruting gisik | gasik angrêsgêpi | sumêblak lir pingul ||

7. pêrak pongol mangul nuksmêng warih | mung sapalih katon | saking toya
kacêlup awake | sinatmata isthanira kadi | dirada jrum lagi |

--- 2 : 249 ---

lêlumban nêng kêdhung ||

8. sumyaring we wimbuh milangêni | munthuk mêmplak katon | lembak-lembak
lumenggang isthane | asêsanti dene dèn langkungi | marang para gusti | kang
umilir sêlur ||

9. winursita kang lumaris aris | ing samana rawoh | padhusunan aran
Kêdhunggudèl | wontên ingkang acêcadhang margi | wadyaji pulisi | sukarja
sêsugun ||

10. Dyan Mas Wiryakusuma kang mranti | rakiting pakuwon | panjuta byor kèksi
lêlängsene | wastra pingul mori angalêmir | saka-sunduk kili | kinayu-apu byur ||

11. para gusti ingaturan kampir |

--- 2 : 250 ---

gya sami mirantos | upacara lon-lonan tindake | rawuh kuwu ingurmatan dening |
gôngsa pelog gêndhing | ingkang ladrang Mangu ||

12. lêlênggahan madyaning pandhapi | saha wadya kamot | palataran kang
tumingal gèbèl | lanang wadon atap pan alinggih | sêmunira sami | tèmbe myat
wong agung ||

13. kamitênggêng kaonangan kongsi | dongong amalompong | saking eram
tumingal kalane | para gusti lêlênggahan kursi | busana di-adi | abyor ting
palancur ||

14. anyunari rêrêngganing panti | pantês-pantês katon | dhèmês-dhèmês parigêl
sajake |

--- 2 : 251 ---

para wadon kèh cêngêng umèksi | sakèhing pra gusti | brêgas bagus-bagus ||

15. kunêng ingkang ningali nêng jawi | gantya cinariyos | kang makuwon
sawadyabalane | larih midêr rambah kaping katri | tan antara sami | abujana
nutug ||

16. pra santana sinunggata bukti | anêng meja ngisor | tan kuciwa pantês
pangrakite | sêsadêhan tansah angidêri | saluware sami | karsa badhe kondur ||

17. Dyan Mas Wiryakusuma Ngabèi | tanggap gya dhêdhawoh | marang wadya
anyulêti age | obor-obor jinajar nêng jawi | bidhal para gusti |

--- 2 : 252 ---

gong sauran barung ||

18. sinarawung swaraning kang janmi | kang sami nênton | gumêr umung
arungan arame | gumarêdêg gumarêbyêg wuri | kanan tuwin kering | lir
angurung-urung ||

19. praptêng nadi palwa gêng wus mranti | saampilan kamot | wuri aglar tembo
tumpakane | para wadu-wandawa prasami | mudhar tambang milir | lampahira
sêlur ||

20. dêduluran dênira lumaris | tan aris samyanon | dhusun agêng agêmah
patrape | duk samana wayah madya ratri | sasôngka kaèksi | sumunar narawung
||

21. angrênggani rakiting kang nadi |

--- 2 : 253 ---

umawela katon | kataman ing ujwala langêne | angarênyêp wêh rênaning kapti |
kongkang ngungkung muni | jroning jurang sirung ||

22. pêksi-pêksi kang sabawèng ratri | kapyarsa tan agop | cingcing goling
kalingan pang mèpèt | mung swarane ingkang kapiyarsi | kalong golongan mrih |
woh ringan maniyub ||

23. sangsaya doh têbaning lumaris | wanci lingsir kulon | winêlah kras baita
lampahe | winantonan praptane kang warih | bêbanjiran saking | lèpèn Dèngkèng
agung ||

24. dadya rikat lampahe kang milir | bangun enjing katon | Langênarja
ambanjêng ujunge |

--- 2 : 254 ---

tan antara pinêthukkên dening | wadyaji kêkalih | angêmban kang dhawuh ||

25. kang jinugug Jêng Pangran Ngabèi | aturira alon | pandukanggèr[7] tinimbangan
age | mring ramanta kangjêng sri bupati | myang rakanta inggih | Jêng Pangeran
Prabu ||

26. Pangran Bèi sandika gya mangsit | mring pambêlah kinon | ngimbir-imbir
umilir palwane | tandya rakit bêrdandosani sami | byar raina nuli | sumiwèng
sang prabu ||

27. pinanggihan lan sang pramèsuari | pinrih acariyos | Pangran Bèi ingkang
mêdharake | lêlampahan sajroning cangkrami | sinuhun miyarsi |

--- 2 : 255 ---

sukèng tyas kalangkung ||

28. pukul sapta linilanan sami | mundur alêlêson | nitih rata jinajaran dene |
wimbasa myang wira kaplêri | rêrikatan prapti | Ngabean jumugug ||

29. lèlènggahan amung sawatawis | amit nulya bodhol | laju kondur jumujug
ngarsane | ingkang rama jêng pangran dipati | pinanggihan mungging | jroning
dalêm agung ||

30. tur pratela lampahe samargi | dènira amomong | dhatêng para sutendra
sakèhe | srêjuning tyas kaarjan ing margi | tlas aturing siwi | gya kalilan mundur
||

31. titi tamat têtelaning tulis |

--- 2 : 256 ---

ing Sabtu Kaliwon | kaping nènêm warane ingkang lèk | wulan Sura wau ingkang
warsi | katrusthan luhuring | saliraning sunu ||[8]

§ Taun Jawi 1808, taun Walandi 1879, wulan Nopèmbêr. [Sengkalan:
pangèsthining barakan sarira nunggil (Ahad Kaliwon, 10 Dulkangidah 1808 A.J.),
sic. seharusnya: Oktober, Minggu, 26 Oktober 1879 A.D.]. (kembali)

Nararya. (kembali)

kondur. (kembali)

mung. (kembali)

dyan. (kembali)

puwara. (kembali)

padukanggèr. (kembali)

Sengkalan: katrusthan luhuring saliraning sunu (Sêtu Kliwon, 6 Sura 1809 A.J., 20
Desember 1879 A.D.). (kembali)